

Poštovani načelnice Milojčiću, dragi vojnici, gospodo generali, oficiri, podoficiri, cijenjeni gosti!

Veliko mi je zadovoljstvo i čast da svim pripadnicima Oružanih snaga Bosne i Hercegovine i svim građanima naše zemlje čestitam 1. decembar - Dan Oružanih snaga BiH.

Danas obilježavamo 7. godišnjicu Oružanih snaga Bosne i Hercegovine i možemo s ponosom reći da je upravo reforma odbrane naš najveći uspjeh u proteklih 17 godina. A ključno dostignuće te reforme su Oružane snage Bosne i Hercegovine. Vaša predanost i naponi koje ste uložili u ovaj proces bili su od presudnog značaja. Naši kompetentni inostrani prijatelji su napredak koji je Bosna i Hercegovina ostvarila u reformi odbrane ocijenili kao najveće postignuće koje je neka zemlja kandidatkinja za pridruživanje NATO-u postigla u tako relativno kratkom vremenskom roku. Posebno uzimajući u obzir prvobitne okolnosti u kojem je bila kada je otpočela proces integracije u NATO.

Međutim, u posljednje vrijeme svjedoci smo sve otvorenijih ataka na suverenitet Bosne i Hercegovine, dovođenja u pitanje njene održivosti, podriivanja njenih centralnih institucija, pokušaja da se reverzira dostignuti stepen napretka, da se ponište rezultati mukotrpnih reformi. Jedan od takvih pokušaja se odnosi i na reformu odbrane kroz javno izneseni zahtjev za ukidanje Oružanih snaga BiH i demilitarizaciju. Mi koji gradimo budućnost ove zemlje i brinemo o miru i sigurnosti njenih građana nikada nećemo na to pristati. Uložiti ćemo još veće napore da završimo posao koji smo započeli.

Izgraditi ćemo Oružane snage koje su sposobne i spremne efikasno odgovoriti na sve sigurnosne i odbrambene izazove, rizike i prijetnje - modernu, mobilnu, dobro opremljenu, obrazovanu i motivisanu vojsku, koja ispunjava sve NATO standarde. Da bismo ostvarili ovaj konačni cilj, moramo nastaviti s reformskim aktivnostima i s realizacijom obaveza u okviru NATO integracionog procesa.

Svjesni smo da napredak tog procesa sada presudno ovisi o ispunjavanju Talinskog uslova za Akcioni plan za članstvo. Mi smo opredijeljeni da knjiženje vojne imovine riješimo na bazi dogovora. Nedavno smo imali i vrlo značajnu odluku Ustavnog suda, u kojoj je jasno rečeno da je država isključivi vlasnik državne imovine, pa i ove 63 lokacije koje je Predsjedništvo odredilo kao perspektivne za Oružane snage Bosne i Hercegovine. Ta odluka je otklonila sve pravne nedoumice vezane za ovo pitanje i smatram da će ona značajno olakšati i ubrzati ispunjavanje Talinskog uslova, te da ćemo vrlo brzo uknjižiti vojnu imovinu i od NATO-a dobiti zeleno svjetlo da otpočnemo naš Akcioni plan za članstvo.

No, bez obzira na tu dinamiku, mi svakako moramo nastaviti sa reformskim procesima i unaprijediti organizacionu strukturu, rad i funkcionalnost Oružanih snaga i Ministarstva odbrane, jer je to u našem interesu.

Želim ovdje jasno poručiti sljedeće: Oružane snage Bosne i Hercegovine ne postoje samo zato jer želimo biti članica NATO-a. One postoje i nastavit će postojati jer su potrebne Bosni i Hercegovini i njenim građanima. One su instrument državnosti Bosne i Hercegovine. Oružane

snage su garant sigurnosti i odbrane naše domovine. I zato će one postojati i biti sve efikasnije, jače i funkcionalnije.

Moramo posvetiti pažnju i uložiti adekvatna sredstva, naročito u nabavku opreme i materijalno-tehničkih sredstava koja su potrebna da bi Oružane snage mogle izvršavati svoje dužnosti i obaveze. To se posebno odnosi na pružanje pomoći građanima i civilnim organima tokom prirodnih nesreća, te izgradnji sigurnog okruženja, o čemu smo umnogome svjedočili u godini koja je evo već na izmaku. Uprkos ograničenim resursima i često neadekvatnim materijalno-tehničkim sredstvima, Oružane snage Bosne i Hercegovine su u proteklom periodu svojim naporima, predanošću i profesionalizmom pokazale i dokazale da su one nezamjenjivi partner građanima i civilnim strukturama u reagovanju na prirodne i druge nesreće, izvođenju operacija deminiranja, izvođenju operacija traganja, spašavanja i medicinskog transporta, te inženjerskih radova.

Neizmjeran je i vaš doprinos afirmaciji naše države na međunarodnom planu. Zahvaljujući vama i vašem učešću u međunarodnim misijama podrške izgradnji mira, Bosna i Hercegovina je od primaoca sigurnosne pomoći izrasla u aktera koji aktivno doprinosi globalnoj sigurnosti.

Od Demokratske Republike Kongo, preko Eritreje, Etiopije i Iraka, do Afganistana, Oružane snage BiH su pridobile povjerenje i poštovanje saveznika i osvjetlale obraz naše zemlje.

Građani ove zemlje su ponosni na vašu hrabrost, vaše uspjehe, predanost i profesionalizam.

I zato smo dužni da u svakoj prilici ponovo afirmišemo vašu ulogu i značaj, te da osiguramo da svakim danom Oružane snage Bosne i Hercegovine budu snažnije i bolje. Sa jakim Oružanim snagama jaka je i sigurna i Bosna i Hercegovina.

Hvala vam!